

**OBRAĆANJE REKTORA UNIVERZITETA U TUZLI PROF. DR. SC. ENVERA HALILOVIĆA  
NA OTVARANJU 38. AKADEMSKE GODINE  
TUZLA, 16.9.2013. GODINE**

Poštovane kolegice i kolege,  
Uvaženi gosti,  
Dragi brucoshi,

Dobrodošli na Univerzitet u Tuzli!

Danas je za nas veliki dan. Danas u našu zajednicu primamo približno 2.700 novih studenata, mladih ljudi koji će iduće četiri godine provesti ovdje u usvajanju znanja i vještina, u razmjeni ideja i sticanju prvih ozbiljnih životnih iskustava. Osnovna je misija svakog univerziteta od djevojaka i mladića – maturanata, stvoriti ljude, profesionalce i intelektualce, koji se po završetku visokog obrazovanja mogu ravnopravno uključiti u društveni i privredni život i značajno kontribuirati razvoju zajednice. Ta odgovornost koju nam je društvo povjerilo, za nas je najvažnija. Zato smo danas ponosi i sretni, ali i uzbuđeni.

Danas trideset i osmi put od osnivanja Univerziteta u Tuzli, 1976. godine, započinjemo akademsku godinu. Dakle, vi ste tridesetosma generacija ovoga Univerziteta i možete biti ponosni na rezultate generacijâ koje su se ovdje obrazovale prije vas. Inženjeri, ljekari, profesori, ekonomisti, koji su ovdje studirali prije vas, izgradili su – ovu privredu, obrazovni sistem, zdravstveni sistem, relizirali su se u istaknute profesionalce i naučnike prepoznatljive izvan granica Bosne i Hercegovine. Vi baštinite tu tradiciju i danas primete obavezu da je nastavite.

Danas je veliki dan i za vas. Vi danas pristupate akademskoj zajednici i postajete akademski građani. Akademski zajednica je univerzalna i globalna. Ona nije vezana samo za naš univerzitet, za naš grad, kanton ili Bosnu i Hercegovinu. Biti student danas znači biti stanovnik svijeta. Globalizacija i ubrzani visoki tehnološki razvoj odrazili su se i na visoko obrazovanje i na studiranje. Znanja koja usvojite na univerzitetu moraju biti primjenjiva bilo gdje u svijetu, i moraju biti relevantna idućih pedeset godina.

Možemo li u vremenu ovako brzog tehnološkog napretka zamisliti svijet za pedeset godina. I je li iko prije pedeset godina – dakle 1963. godine, mogao zamisliti da će svaki student imati mobitel, da ćemo imati laptope i plazma televizore, CT uređaje, elektrane na vjetar i Sunce... Je li iko tada mogao predvidjeti šta će nam donijeti Internet?

Struka koju ste izabrali vjerovatno će za vrijeme vaših karijera doživjeti velike promjene. Zbog toga vaše obrazovanje mora biti fleksibilno. Na Univerzitetu morate steći standardna znanja, vještine i kompetencije koji će vam trebati da uđete u profesiju. No, morate se naučiti i kako dalje da učite, kako da kuminicirate, da putujete, da svoja znanja prezentirate. Savremeni koncept obrazovanja podrazumijeva učenje cijelog života. Imajte to na umu.

Mi, vaši profesori, asistenti, univerzitetska administracija, kolege stariji studenti, ćemo vam pomoći u tome. Univerzitet u Tuzli vodi politiku otvorenih vrata za studente. Slobodno se obratite svojim profesorima, svojim dekanima i prorektorima koje danas vidite ovdje na ovoj bini.

Sve što radimo mi radimo zbog vas, da bismo vama – našim studentima, stvorili što bolji ambijent i klimu – za učenje, za sticanje znanja, za zdravu konkurenciju, za mobilnost i internacionalizaciju. I u vremenu velike krize, koja obilježava početak vašeg studiranja, mi nastojimo držati korak u vremenu i unapređivati kvalitet obrazovanja na Univerzitetu. Dajemo sve od sebe da vi ekonomsku krizu što manje osjetite.

Univerzitet u Tuzli je univerzitet otvoren promjenama. Prvi smo integrisani univerzitet na Balkanu, među prvima u Bosni i Hercegovini smo prihvatili studiranje po bolonjskim principima, uvezani smo u mrežu europskih i svjetskih univerziteta. Nastavni planovi i programi se redovno obnavljaju i unapređuju novim spoznajama i modernim metodama. Mi danas nudimo ukupno 54 studijska programa i pokrивamo gotovo sve oblasti nauke.

Postojeći nastavni plan i program po kome ćete završiti prvi ciklus studija je radikalno promijenjen u odnosu na prebolonjski kurikulum. Bolonjski proces podrazumijeva interaktivnost u nastavi. Interaktivni odnos podrazumijeva koherentnu saradnju u svim oblicima nastavnog procesa između studenata i nastavnog osoblja. Učenje podrazumijeva vaš stalni angažman u nastavnom procesu, stalno prisustvovanje nastavnim aktivnostima: predavanjima, vježbama, konsultacijama, seminarima i drugim nastavnim oblicima. A ocjenjivanje je zasnovano na bodovanju prisustva nastavi, aktivnostima, testovima tokom semestra i završnoj provjeri znanja. Sve nastavne aktivnosti se evidentiraju, sabiru i valorizuju. Završni ispit je samo jedan dio konačne ocjene. Nadam se da ćete tokom redovnog nastavnog procesa sve studentske obaveze uredno okončati, pa će vam završni ispiti biti samo formalnost.

Uspjeh u studiju u najvećoj mjeri zavisi od posvećenosti studiranju. Ukoliko ste posvećeni i aktivni na nastavi, ukoliko redovno izvršavate svoje obaveze, svoje studiranje možete završiti u predviđenom roku. Od vas se to očekuje, i danas, na prvi dan nastave, vas želim podsjetiti na višetsruka očekivanja od vas: završetak studija u predviđenom roku od vas očekuju vaši roditelji, to očekujemo i mi – vaši nastavnici, ali to očekuje i društvo. Nemojte iznevjeriti ta očekivanja i šanse koje vam se pružaju. Dobrim obrazovanjem unaprijedit ćete sebi cijeli život. Proširiti ćete perspektive i povećati sebi mogućnosti.

Živimo u društvu znanja i znanje je najvažniji resurs privređivanja. Znanje je resurs koji dijeli svijet na bogate i siromašne, na razvijene i nerazvijene. Vi ste sada u životnoj dobi kada trebate intenzivno stjecati znanje. Postignete li dobro obrazovanje, život će vam biti lakši i sadržajni. Imajte to na umu, to je važno za vašu budućnost.

Dragi studenti,

Izabrali ste dobar univerzitet. Vjerujem da ćete se u to ubrzo i sami uvjeriti. Još jednom vam želim najsrdačniju dobrodošlicu.

Ovime i službeno proglašavam da je na Univerzitetu u Tuzli započela akademska 2013./2014. godina.

Živjeli i sretno!